

五百家註柳先生集

五言古詩卷之五

七

欽定四庫全書

柳先生集附錄卷一

勅賜靈文廟額牒

尚書省牒柳州靈文廟禮部狀准都省批送下廣南西路轉運司奏據柳州申據本州鄉民父老嚴後等狀陳伏覩唐柳州刺史元和年立廟於羅池至今三百年來廟享不絕州境凡有水旱疾疫之災及公私祈禱無不感應乞加封爵或廟額柳州本司保明委是詣實尋符

太常寺依條看詳據太常寺狀勘會唐柳州刺史立廟
於羅池係前代名賢轉運司及州司保明立廟至今三
百年來廟享不絕凡有水旱疾疫祈禱感應自熙寧三
年八月已後至去年六月計十餘次祈禱感應伏候指
揮牒奉勅宜賜靈文之廟為額牒至准勅故牒元祐七
年六月三日牒

中大夫守右丞蘇

右光祿大夫守左丞蘇 右正

議大夫守左僕射

初封文惠侯告詞

勅文章在冊功德在民昔有其人是為不朽生而昭爽
後且不亡惠我一方是宜崇顯柳州靈文廟唐刺史柳
公仕于唐室卓有才名勵志精顓記覽浩博貫穿經史
溢為詞華覽其遺編灼見志學龍城雖遠不鄙其民爰
出教條動以禮法家富有業經學有師風行俗成田里
悅喜自言將死館我羅池今數百年英靈猶在祈禳禱
祀如響應聲水旱疾憂咸有歸賴啓封侯爵因民之情

尚其知歆永庇南土可特封文惠侯

崇寧三年七月七日中書舍人臣薛昂行

加封文惠昭靈侯告詞

勅柳州靈文廟文惠侯生傳道學文章百世之師沒以
神靈福祐一方之庇是有功德於人者其於爵號何愛
焉惟神望冠河東名高唐室其才足以命世其政足以
裕民出守柳城終享廟食君蒿之際盼蠻必通屬者春
夏之交雨暘愆候禱焉即應歲以是豐故郡人願請諸

朝而使者遂上其事朕嘉神孚惠爰益褒封尚赫光靈
保有常享可特封文惠昭靈侯

紹興二十八年八月二十六日中書舍人臣王剛中
行

柳先生揚子新註

學行篇

如將復駕其所說則莫若使諸儒金口而木舌

先生云金口木舌鐸也使諸儒駕孔子之說如木鐸

也

修身篇

熒菟曠枯糟莩曠沈

先生云熒明也熒菟司目之用者也糟當為精莩如
葭莩之莩目精之表也言菟之熒明曠久則枯精之
輕浮曠久則沈不目日月目之用廢矣以至於索塗
冥行而已

擿埴索塗冥行而已矣

先生云糟當為精言盲矇之患神光久曠則枯目精則沈於是以杖擿地而求路冥冥然行矣

孝至篇

勤勞則過於阿衡

先生云阿衡之事不可過也過則反

漢興二百一十載而中天其庶矣乎

先生云揚子極陰陽之數此言知漢祚之方半耳

羣公書贊題跋碑記

金定日
卷一
答柳子厚書

劉禹錫

禹錫白零陵守以函置足下書爰來屑末三幅小章書
僅千言申申疊疊茂勉甚悉相思之苦懷膠結贅聚至
是泮然以銷所不如晤言者無幾書竟獲新文二篇且
戲余曰將子為巨衡以揣其鈞石銖黍余吟而繹之顧
其詞甚約而味大淵然以長氣為幹文為支跨躒古今
鼓行乘空附離不以鑿枘咀嚼不有文字端而曼苦而
腴佶然以生癰然以清余之衡誠懸于心其揣也如是

予之戲余果何如哉夫矢發乎羿穀而中微存乎他人
子無曰必我之師而能我衡苟然則譽羿者皆羿也何
乎索居三歲俚言蕪而不治臨書軋軋不具禹錫白

又與柳子厚書

間發書得箏郭師墓志一篇以為其工獨得於天姿使
木聲絲聲均其所自出抑折愉繹學者無能知繁休伯
之言薛訪車子不能曲盡如此能令鄙夫冲然南望如
聞善音如見其師尋文寤事神驚心得倘伴伊鬱久而

不能平嗟夫郭師與不可傳者死矣弦張柱差

楚宜反 枵

然貌存中有至音含糊弗聞噫人亡而器存布方冊者是已余之伊鬱也豈獨為號師發邪想足下因僕書重有槩耳不宣禹錫白

又謝柳子厚寄疊石硯

常時同硯席寄此感離羣清越敲寒玉參差疊碧雲煙嵐餘斐亶水墨兩氛氲好與陶貞白松窗寫紫文

題羅池廟碑陰文

田 錫

柳子厚終於柳州以精多魄強為羅池之神昌黎韓退
之叙其事而銘之于碑矣其有遺意錫幸得而紀焉古
人或有其言而無其行或有其質而無其文故周勃持
重而詞則寡焉子夏美才而行或缺焉猶能安漢皇之
祚游仲尼之門惟公之文緯地經天惟公之行希聖齊
賢彬彬然若黼黻之華袞鏘鏘然若咸韶之在懸古人
或有其才而無其時必避害以異令人以隨顏子之賢
當周德之衰微孟軻之仁值王道之陵遲亦能服膺於

聖人之道偃蹇為霸者之師惟公策名於貞元之間通籍於元和之時闊步高視飛聲流輝謂佐王之才得以施謂當朝大臣不我遺古人或雖得其時而無知己設有知己一人而已故國僑出涕以子皮之死夷吾之慟以鮑君亡矣唯公有劉公禹錫之交有韓侯退之在朝有呂衡州以倜儻與公為游處有皇甫湜以文章與公相遊遨而公位不過為南宮外郎命不過為柳州之牧以謫而出至死不服如明堂之材朽於谿谷如千里之

馬軛於輦轂時耶命耶以是知為仁者未必獲祐修德
者或虧多福予聞四瀆視諸侯五嶽視三公為靈神甚
貴在祀典尤崇所職者以明以晦所主者為雷為風助
天以總萬靈助國以濟三農所以籩豆有加蘋蘩用豐
其䟽爵也有袞冕劔舄其用樂也有簫笳笙鏞安得公
之生也惠惟及於一州公之亡也神猶介於遐陬唯裔
夷感慕而靈祠潔修迺神之威有荃橈兮桂舟饋神之
奠有椒漿兮蘭羞無金策追封之贈無袞衣加寵之優

使公與沈湘之魂為偶而配濤之神作儔以公之齊聖
廣淵聰明正直宏深之量昭明之誠而不為星為辰幹
運陰陽拱於北辰不為嶽為瀆含吐風雲康於黎民胡
為在柳州之陋為羅池之神是知天命難謫兮命靡常
因紀為碑陰之文

柳侯畫像贊

并序

鄒餘

元祐七年春建安曹公出守龍城郡視事之初具肴酒
詣唐刺史柳侯廟祠之祠訖公徘徊廷序瞻想遺迹疑

其歲月之久塑像不類因博訪之得侯舊畫像於民間
公敬視之釋然自喜曰此真柳侯也天骨峻聳風度爽
秀雖圖繪剝缺而神采氣焰自爾卓越文人才士宜其如
此余將模之以廣其傳夫身賢賢也敬賢亦賢也柳侯
固賢而可敬者也曹公之來後數百年不緣姻故不附
勢利乃敬而慕之如此則曹公之心可見矣曹公諱現
字晦之是年四月屬吏鄒餘謹序而贊之贊曰

峩峩柳侯器範高雅少年才名雷搏電射睥睨青雲萬